

UYeesu Mesiya

Umuunu yuna ikivasetula avaanu va nyi soona



Amayandikhwa na mashoolo: Willem de Vink

Shilogolo sha Shisangu

AMASWI AMAHENSA



Bibiliya: Mu Bibiliya ukwiliile kiyimba shina uNguluvi ikivaloleela avaanu na shina iiva nawo.

Kisaajila: UNguluvi isaajila, hata yive kusiina umuunu yuna iyiitikhwa. UNguluvi isaajila, nda shiyooli owe walambiisila uwunansi na wisakula kiwulekha. Tikwiliile kisaajilwa kwa kiiva uYeesu wátoolaga ululawo lwesu, luna tikhanda tidaayiwa.




Kitina: Shila shiinu shikhava shipya pina uYeesu akhatina mu nyi. Inyi nu wulanga fikhaseetulwa nu Nguluvi, kiiva fipya.

Lihuuvi: Kimuhuviilila uNguluvi kwa shila shina wátahisaaga kishisenga.



Lusawo lwa Nguluvi: Litaawa lya Yeesu. UNguluvi wáyinsile mu nyi ngaja muunu, ngaja Lusawo lwa Nguluvi.

Luyimiililo: Fiinu fyona ifinofu fina uNguluvi isakula kivapeela avaanu vala vina viigaha shila shina isakula.



Mafuunyo: Wilogola nu Nguluvi, kwa shawuti awu bila shawuti na ukimupuliisa umwene.

Malayikha: Munjaajila wa Nguluvi yuna asiwonekha.



Mesiya: Mutwa 'Yuna adudumisiwe amafuta.' Mesiya (liswi lya Shihebulaniya) liganulwe kwa Shigiliki ngaja Kilisito.

Musalaaba: Shiinu sha kivalafisisa avaanu, shina shasjenjelwagwa kimukhomeelela uYeesu kwa kigana yumwene. Shimanyilo kwa vavanda vaakwe wona ava Yeesu.



Mwanandeje: Muvanda wa Yeesu.

Numbula uMunofu: UNumbula wa Nguluvi yuna isakula kikhala mukhati ya vina vikimuyinatila uYeesu.

Pasaakha: Shiwungo sha kifyukha kwa Yeesu. Ishiwungo isho shikhanda shiwungo sha kikumbukha uwukulukho wa Vaisilaheli kihuma ku Misili.

Shetaani: Umulugu wa Nguluvi na vaanu yuna asiwonekha, khanji imanyikha ngaja munansi.

Shipuga shimo: Vavanda va Yeesu vikumbukha imfwa yaakwe nu lufyukho, kwa kimenyulilana umukhaate na kiilya na kiing'wa idivaayi.


Uwumi wa shiluta: Uwiikhasi nu Yeesu ngaja uNguluvi shina akhandi agulumiiile. Uwiikhasi uwo wiyansa lino, wukiyimena imfwa, wungaya wudugo.

Wufyukho: UYeesu wáfyukhaga kihuma kwa vina vafwile. Ilisiku limonga avaanu wona vakhafyusiwa kihuma kwa vina vafwile. Baheene uNguluvi akhamuhiga shila muunu.

Wunansi: Njowo sina tisenga sina sikimukhalasa uNguluvi, sina sikitusivila ose kifishila ulugoto lwa Nguluvi.

Wutwa wa Nguluvi: UWutwa wa Nguluvi wuli pala pina avaanu vikimutiila.

Yeesu: Litaawa lya Lusawo lwa Nguluvi, uluganulo lwakwe, 'UNguluvi ikulusa.'



UYEESU MESIYA YU NAANI?


UYeesu wákhhalaga maakha ngaja 2000 ndeeni gina gashilaga mu Isilaheli. Tikimutambula 'Yeesu Mesiya' awu 'Yeesu Kilisito.' Uluganulo lwakwe kiija Mutwa. Yisili kiija Mutwa hela. UYeesu wátambulwagwa 'Lusawo lwa Nguluvi' na khanji 'Lusawo lwa Vaanu.' Uluganulo lwakwe kiija umwene Nguluvi khanji muunu. Ulusimo ulwa wiikhasi wa Yeesu lutaviliilwe mu Bibiliya. Ulusimo ulu lunofu mandu shila luhaavi.

ULUHAAVI LWA YEESU

Uluhaavi ulu luyansa pina uYeesu wásawaagwa. Avaanu vakhandi vishuula kwa magulu, idogovi, ingamiya awu kwa falaasi. Imbali nyinshi isa ku Wulaya, Kunena iya paakhati na kunyiikho iya Afilika sikhandi mu wutemi uwa Shiluumi. Avaanu vinshi vasikhandi vameenye kiyimba na kiyandikha, leelo aVayahuudi mu Isilaheli vakhandi vameenye kiyimba na kiyandikha. Vitambulwagwa 'Vaanu va Litaafili.'

UNguluvi ilogola mu Litaafili, mu Bibiliya. Umwene Muwumbaji wa shila shiinu na isakula kiiva mumanyi wa shila muunu. UYeesu wáwonensaaga ilyo bahawuvalafu mandu.





ISILAHILI ULUHA AVI LWA YEESU

Lijumbi ilikhoma: Yelusalemu

Mabooma: Galilaya. Samaliya. Yudeya.

Uwukhoma: Inyi iya Isilaheli yingalingaana nu wukhoma wa nyi ya Wusangu mala khavili awu khatatu ndeeni.

Ihaali ya nyi: Lukwali uluhaavi lwa lujuva ni lifushe, khanji uluhaavi lwa shifuku.

Isiyaasa: Kihuma umwakha gwa mashumi mutanda na gatatu (63) pina asinaasawe uKilisito, aVaisilaheli vakhandi viitemwa na Valuumi.


Selekhaali: Umukhoma wa Shiluumi, uPontiyo Pilato, iitema Isilaheli. UTibeliyo, umutwa wa Shiluumi, akhamutemile.

Diini: Wuyahuudi. AVayahuudi vakhandi ni nanda imbaagule ya kifuunyila ku Yelusalemu. Avatambule visenga insengo soona isa diini na kuna vamanyisaaji (ngaja ndenela aVafalisaayo) vina mbakha vavawulanise ayaanu amamanyiso ga Bibiliya.

Shilogolo: IShihebulaniya (shilogolo sha Vayahuudi), iShigiliki (shilogolo sha nyi soona mu nsiku sila), iShilatiini (shilogolo sha Valuumi).



Kwashi avaanu vinshi vikungaana ku mukhoga?



Yipinyaji, uWutwa wa Nguluvi wiyinsa.



Yansaaji uwiikhasi wupya.




Uwuhigo wa Nguluvi waafikha, ngaja muunu yuna akheete inemo ayipinyile kidumula amapishi.




Shila lipishi lina lisiikhoma amakhomo amanofu lidumulwa na kitaagwa mu mooto.

Ose woona pamonga tingadumulwa. Yu naani akwiliile kikhala uwiikhasi wunofu?

Shiyooli. Kusiina umuunu yuna akwiliile kihgukha uwuhigo wa Nguluvi. Leelo, kuunyuma yangu, iyinsa yula yuna akhawuseetula khabisa uwiikhasi weenyu.



Wuli, shiyooli mwisakula uwiikhasi weenyu wusetushe? Ino, yinsi mulambiisile uwunansi weenyu na mutwiniiswe mu malenga aga.





Mwayosewa uwunansi weenyu. Lino muyipinyile kiyansa uwiikhasi wupya.

Avaanu woona vikimutambula umukhomaaji uyo pala pa mukhoga, Yohana Mutwiniaji...

One nisili shiinu. Nikimuyandaalila injowo yula yuna iyinsa kitutaviilila kiija, uNguluvi yu naani. Asivatwinie kwa Numbula uMunofu nu mooto gwa Nguluvi. Insengo ngaja iyo, yisivaseetule khabisa.



Na paanyuma...



One nisakulwa nitwini siwe noowe.



Lino owe gahaga hela, kwa kiiva tisakulwa tigehe goona gina uNguluvi isakula.




Daada, uWutwa waakho wuyinse na shina widobokha gasenjеше.



Shitu iliswi lipuliisikha kihuma kushanya...

Eena, owe yuuwe Lusawo lwangu, nikugeene na ukinishendeefya.



UYohana Mutwiniaji ikivayandaala aVaisilaheli kiyinsa kwa Mesiya. UYeesu pina akhayinsile, inyi ya Isilaheli yikhanda luvala ludodo hela, ulwa wutwa uwa Shiluumi.



AVayahuudi, mu nyi ya Isilaheli vikiyiwona kiija, vawoto na viwonelwa. Avaanu vawuhepeleese kwa lihaahi, uluhaavi luna uMesiya akhayinsa. UMesiya uyu, yumwene Mukulusaaji yuna uluyinso lwakwe lwatahisiwaagwa mu Mayandikhwa aManofu aga Vayahuudi. Umwene akhajinia ishiyooli sha Nguluvu.

Pala pa mukhoga gwa Yolodani, uYohana Mutwiniaji ikimuwonensa uYeesu kwa ludole.

Loleela, yula yumwene Mwana Nkholo wa Nguluvu, yuna iwuusa uwunansi wa vaanu woona.



UYeesu wáganile kitwinisiwa, uNumbula wa Nguluvu wámulongosa mu luvanda.

Iikhala ukho kwa nsiku mashumi gana, ishilo ni shiminsi, pina iiva ukho, asiilya shoshoona kwa kiiva ya kifuunya. Ikiyiyandaala kwa kiiva ya nsengo yaakwe.



UYeesu isakulwa kiwonensa inyi soona kiija, uNguluvu isakula kikulusa avaanu kihuma mu wuhigo wa mfwa.

UYeesu iijelwa nu Shetaani, umutwa wa nshisi yuna asiwonekha. Umwene iitema inyi soona kwa mfwa nu wunansi.



Daada. Nisiligahe lyolyona lila lina wisakula.

Leelo uShetaani mugomanjilaaji, ijjesa kimupeela uYeesu amahiiva amavi. Iigaha ndeeno, baheene uYeesu aleshe kisenga insengo ya Nguluvi.

Nda owe uli Lusawo lwa Nguluvi, gajova amang'anga aga gasetushe gave makhaate.

Ndaali! Mu Mayandikhwa aManofu yiyandiikhwe kiija, ishakiilya sheene shisikimugaha umuunu kiiva muumi, leelo iiva muumi kwa liswi lyolyona lina liihuma kwa Nguluvi.

Owe, nda uli Lusawo lwa Nguluvi, yigwisa pansi, kwa kiiva mu Mayandikhwa aManofu yiyandiikhwe kiija, uNguluvi asivafilishe avamalayikha vaakwe vakuyangalile, wope vasikuyanshe mu mawokho gaanave.

Lolela, nisikupeela uwutawulilwa wona mu nyi soona, nda unifugamile na kunifuunya.


Gaagana kishila ago, uShetaani wámulekha uYeesu, kwa luhaavi ulo. Baaho avamalayikha vayinsa kimusunga.

Yiyandiikhwe khanji, usikhamujelaga uMutwa uNguluvi waakho.



Wukha Shetaani. Yiyandiikhwe kiija, umufuunyaje uMutwa uNguluvi waakho. Khanji, umusenjelaje mwene duguli.

UYeesu pina iitina ku Galilaya, akhandi ana ngufu sa Numbula uMunofu. Umwene wákulilaga mu booma iyi, yina yili kunyiikho ya Isilaheli. Pina ishuula, avaanu vinshi valongosania nawo. Vaava vihiiva na kiyiposa nda uYeesu yumwene Mesiya, yuna imola saakwe siyandiikhwe na vakuwamalago...

Kukhandi kuna shiwungo sha noolana ku lijumbi
lya Kana, lina lili ku fidunda fya Galilaya...



UYeesu woope akwali mu shiwungo
isho, lumo nu maayi waakwe, na
vamanyi vaakwe vamonga.





Leelo paakhati naakhati ya shiwungo...

Baaho, idivaayi yaasila.


Gahaji hela, lyolyona lina uYeesu asivajovele.



Mumemye amalenga mu nsimikho inkhome, baheene muneje na kimupeela umuyimililaaji wa shiwungo, kiija awonje.



Aga gasili malenga khanji, leelo divaayi nofu mandu.



Ebu yiwonja. Owe uyiviishile idivaayi inofu mbakha kuwudugo.



Nisinawungaje ishiwungo ngaja ishi. Nisinagagaje amalenga gihambusiwa kiiva divaayi, idivaayi inofu mandu.

Insengo iyo, yasengwagwa nu Yeesu uwa ku Nasaleeti.

Umwene uyu yu naani?

Kapelinawumu lijumbi lya valova nswi lina liikula mu mbalamo ya lilamba ilikhome lya Galilaya. Apa baheene uYeesu iyansa kilogola bahawuvalafu ulwa Wutwa wa Nguluvi.



Apa baheene pina ikivabaagula avamanyisiwa vaakwe ava wutasi.



Petulo, twala ishipugo pa shoogo, apo muyiise inyaafu seenyu.



Wee mutwa, tasenga insengo ishilo shoona, wala tisaalova.



Leelo, kwa kiiva owe waajova ndeeno...



Aga miitu. Nisimeenye khabisa!





Yaakobo,
Yohana, yinsi
panu!
Tisinalovaje
inswi nyinshi
ngaja isi!



Wee mutwa, uwuushe
kunyangu kiiva one nili
munansi.

Usikhatiilaga Petulo!



Nifwataji.



Yinsi munifwataje, kiyansa
lino nikivapeela insengo iya
kilova avaanu.


UYeesu ijenda mu mbali soona isa Galilaya, lumo na vamanya siwa vaakwe. Ikivamanyisa avaanu woona ulwa Wutwa wa Nguluvi.

Iponia amatamu goona na kigadaga amalungu. Avaanu viswiga na kimufwata. Avanyi viihuma hata ku booma isinji na ku Yelusaleemu, ku lijumbi ilikhome ilya Isilaheli. Vikilipuliisa kwa wunofu, shila liswi lina ikililogola.




Shiba muna mukimusakula uNguluvi, kiiva uWutwa wa Nguluvi wukhava waanave.


Shiba omwe muna mwidobokha mandu kigaha gina idobokha uNguluvi, kiiva uNguluvi akhavapeela gina mwidobokha.



Shiba omwe muna mwikhoola lino, kwa kiiva mukhahekha.




Shiba omwe muna mukhalalilwa na vaanu kwa kiiva yangu. Shendeevaji na kishima kiiva, muvishiilwe amahombo makhome kwa Nguluvi.






Muvagahilaje avaanu avanji, ngaja omwe shina mwidobokha kigahilwa.



Muvaganaje avalugu veenyu na kivafuunyila kwa Nguluvi.



Gahaji amanofu kwa wufiho, musikhayiwonensaaji pa vaanu.



Yoyoona yuna ikimuloleela uwashimaayi kwa kimudobokha, iiva wáwaafukha mu numbula yaakwe.



Iliho lyakho ngaja lumuli lwa movili gwakho. Iliho lyakho nda liloleela finofu, umuvili gwakho goona gusiive mu wuvalafu. Leelo iliho lyakho nda livi, umuvili gwakho gwiva mu nshiisi.



Kusiina umuunu yuna akwiliile kivasenjela avatwa vavili, kwa luhaavi lumu. Uwusi nda wukikutema, usikwiliile kisenga insengo ya Nguluvi!




Musikhahiivaji ulwa pamilaawu. Wusakulaji tangusiina uWutwa wa Nguluvi, baheene aganji musipeelwe.



Gahaji ngaja shina nikivajovela, baheene musihwanane nu muunu yuna isenga ilitembe lyakwe pashaanya ya lipaama. Nda musigahile ndeeno, mwiva musenjile pa luhankha.

Ilisiku limonga ku lijumbi lya Kapelinawumu, ifipuga fya vaanu vaminyilisiaaga na kipilima inanda, yina akhandi akwali uYeesu.

Tisikwiliile kaa, kiyinjila mukhati umo.



Mbakha timuyinjise umwene nu lupaasa lwakwe, kishilila pa lwansa lwa litembe.

Luli kwi luna lupeefu mandu, kimujova umuunu yuna atengelemwishe umuvili, 'Wasaajilwa uwunansi' awu 'Yiima, ujende'?

Akwiliile wuli uyu, kilogola ndeeno?

Ikimutofola uNguluvi.

Yu Nguluvi mwene duguli, yuna akwiliile kisaajila uwunansi.




Kuna shii kushaanya ukho?

Valeshi! Avamanyi awo, vana lihuuvi likhome.



Wasaajilwa uwunansi waakho.

Lino mumanye kiija, uMesiya ana wutawulilwa uwa kivasaajila avaanu uwunansi mu nyi muno. Lino nijova, yiima! Yitwikha ulupaasa lwakho ulutaje kukhaaya yaakho.





Shiyooli, aga miitu!


Eena! Lino naapona, nikwiliile kijenda!

Loleela, ijenda!

Leelo vasili woona vina vikigashendeevela amanofu gina uYeesu ikigasenga. Avakhome va diini vikimuseesa uYeesu, nda iyinatila indaji sa Sabaato. Mu nyi ya Isilaheli avaanu vikhaanwa khabisa kisenga insengo yoyoona, mu lijuva lya Sabaato.



Uyu muunu yuna ana liwokho lina likholoweeshhe. Wuli, lunofu ilisiku lya minsiyaano kigaha ulujowo ulunofu?



Golosa iliwokho lyakho.



Haa! Naapona!



Uyu isakulwa timubude!

Avakhome ava ku Yelusalemu visakulwa vajovelwe kiija, umuunu uyu ikiyiyasa inyi.

Avaanu pina viyonjelela mandu, uYeesu na vamanyisiwa vaakwe viwuukha na kishuula kwa shipugo mu lilamba lya Galilaaya.






Wee mutwa titanga!
Tiing'aba!



Kwashi mutiila?
Wuli, ilihuuvi
lyenyu lidoodo?












Vatama!
Singamala!



Vikishipinya ishipugo shaanave ku mwambwa ya lilamba. Leelo kihuma ku shidunda vipulikha ishawuti ya muunu ilyova...


KHAAA!







Nikivajovela, uLusawo asikwiliile kilusenga ulujowo loloona mwene duguli. Ikilusenga lula hela luna ikilusakula uDaada. Nisenga gina ageene uDaada yuna wánifilikhaga. Nisiyinsile kisenga gina nigeene yuune.



UYeesu iiluta pa shipata, pina pangaya vaanu, baheene afuunye...




Haya loleeli, gasigele matunduti ishumi na gavili (12) gina gamemile.



Ava vaveene avanyalukholo vavili uPetulo nu Andeleya...



Avanyalukholo vavili ava, uYaakobo nu Yohana...



UFilipo nu Natanaheeli...


UTomasi nu Mataayo (yuna ulwamwandi akhandi mutofya khoodi wa selekhaali ya Shiluumi).



UTadaayo nu Yaakobo uyunji.



USimoni (umulwila inyi) nu Yuuda uIsikaliyoote.




Lutaji, yoyoona yuna ikivasaajisa omwe, iiva ikinisaajisa one. Khanji yoyoona yuna ikinisaajisa one, iiva ikimusaajisa yuna anifiliishe one.



Avanandeje ava ishumi na vavili (12) viiwuya, vana lihaahi likhome ilya nsengo yaanave iya wuvanda. Gaganaga kishila ago, uYeesu isakula kiluta nawo pa shipata, leelo ililugu lya vanu vasikhageene khabisa kivaleshela.

Inkungulo nyinshi, leelo avakungulaaji vasheefu. Mufuunyaji uMutwa umunya mugunda, baheene avafilishe avakungulaaji.



UYeesu ikiyitenekha khanji kikhoma na kivaponia avatamu. Lino kwititivala...


Filipo, avaanu woona ava vasiipate kwi ishakiilya? Omwe, vapeeli ishakiilya valye.



Amahombo ga meesi munaana, ndi gasavakwila avaanu ava.


Panu akwali umudiimi ana makhaate gasaanu ni nswi inang'ana sivili. Kusiina ishinji shoshoona.

Vajoveli avaanu vakhale mu fipuga, vave mashumi gasaanu gasaanu ndeeni.




UYeesu ikimufuunya uNguluvi...

Wáyitenekha kigava amakhaate ni nswi sila.



UYeesu wáshiyonjelesaaga ishakiilya isho, magana mashumi ga vaanu valisiwaagwa...



Tisakulwa timutemye kwa ngufu, kiiija ave mutwa.




Uyu, shiyooli yumwene uMesiya yuna wátahisiwaagwa kiyinsa.

Haya loleeli, gasigeele matunduti ishumi na gavili (12) gina gamemile.



Uluhaavi lwafikha avaanu ava vawuyaje. Omwe, yangali ishipugo sheenyu mulowoshe ku mwambwa yila. One nisigala pa shidunda baaha, nifuunya.





Paanyuma...



Musikhatiilaji, yuune.

Haaa! Ili linguluvi!




Mutwa nda yuuwe, nijovela nijende pashaanya pa malenga, niyinse kunyaakho.

Haya, yinsa Petulo.



Wee mutwa, nikulusa!



Kwashi witungumala Petulo?

Kuna vaanu vina visakula kimutemya uYeesu ave mutwa. Aveene vihuviilila kijja, kwa kilongosa kwakwe, uwutwa wa Shilumi wukhauusiwa. Shiisho ndeen na vina vikimugomanjila uYeesu vionjelela, vikiyitenekha kimupiikha nsiku soona. Visakula kimuhomegania kwa vaanu na kimubuda.




Mutwa, wayinsa yooli kuno?

Wuli, mukinisakula kwa kiiva ya makhaate gala gina navapeelaga?



Musikhasengaji insengo kwa kiiva ya kipata ishakilya shina shinanjikha, leelo kwa kiiva ya wuumi wa shiluta.



One yuune shakiilya shina shikivapeela uwuumi wa shiluta. Umuvili gwangu guhumisiwa kiiva ya wuumi wa vaanu woona.



Umuunu uyu, akwiliile wuli kitupeela umuvili gwakwe tilye?

Wudehi wutupu!



Lekha, tiwuushe!

Uyu, iilwa kimujanga shila muunu.




Wuli, na yuumwe mwisakula kiwuukha?

Mutwa, tisiilute kwa naani? Owe una maswi gina gikitupeela uwuumi wa shiluta.



Kigomanjilwa kwa Yeesu kwayonjelela kwa ngufu mandu. Ikiyihaama ibooma ya Galilaya na kiyitenekha ni nsengo yaakwe mu mbali isinji sa Isilaheli lumo ni shipuga sha vavanda avashimaayi na vavanda avagoosi.



Paanyuma iwukha iiluta ku Yelusalemu.




Avaanu viijova one yuune naani?

Vijova owe uli mukuwamalago.

Pina vali mu lushuulo...



Na yuumwe wuli?



Omwe mwijova one yuune naani?



Owe yuuwe Mesiya, Lusawo lwa Ngulovi, yuna muumi.




Musikhamujovelaji umuunu yoyoona. Umesiya isakulwa kiluta ku Yelusalemu kilafisiwa na kiifwa. Leelo ilijuva lya wutatu akhafyukha kihuma kwa vina vafwile.

Kunja ya lijumbi lya Yelusalemu, wiila wiila avaanu viibudwa. Viibudwa kwa kikhomeelelwa pa musalaaba, uwubudaaji uwuvi uwa Valuumi.



Umuunu yoyoona yuna isakula kinifwata one ayikhaane, ayihumie, anifwate shila lisiku, hata yive kiifwa.

Umuunu yoyoona yuna isakula kiwusaajila uwuumi waakwe yumwene, akhawuyasa, leelo yuna ikiwuyasa uwuumi waakwe kwa kiiva yangu, uyo asiwupate.



Manyaga kiija, kuna Nguluvi yumo hela.

Ishiinu ishikhome kunyaakho, kimugana uNguluvi kwa numbula yaakho yoona na kimugana umuyaago, ngaja shina uyiganile yuuwe.



Uluhaavi ulo ku Isilaheli, kukhandi kuna njinji sa vaanu avanya nyawulova. Inyawulova, wutamu wuvi mandu. Avaanu vina vayambuhisiwe uwutamu uwo, vakhandi vasiyitikhwa ni ndaji sa Musa, kihansinkhana na vaanu vina vasiyambuhisiwe.



Avanya nyawulova vakhandi vilyova ilyowo popoona pina viiluta, kivapavila avaanu avanji, baheene vamanye kiija viyinsa.

Yivavalaji! Avanya nyawulova!



Yeesu mutwa! Utusungupile.





Lutaji, muyiwonense kwa vatambule.




Wuli, tilute kwa mutambule? Kipiimwa?


Wuli, pina taagaha ndeeno, baheene tisiipone?



? !



Loleela! Naapona!



Taapona!

Eena! Lino one, nikwiliile kijenda!



Haleluya! UNGuluvi munofu. Tihonjesa mandu!



Wuli, vasavalasiwa vaanu woona ishumi? Avanji gonja vali kwi? Kwashi vasayinsa kimuhonjesa uNGuluvi?



Yiima! Yisili kiija ilihuvi lyakho lyakuponia hela, leelo khanji lyakukulusa.

Avakhome va Vayahuudi mu Yelusalemu, vikivafilikha avavanda vaanave kwa Yeesu, kiiija vamuseese injowo sina ilogola pina ishuula. Aveene vikisikhaana khabisa insengo saakwe.

UYeesu ihansinkhana na vaanu avanya njendo imbi ngaja avashemi, avatofya khooi vina vikivasenjela aValuumi...




UMesiya wáyinsa kivasakula vala vina vayajile, kiiija avakuluse.

UYeesu ikivaponia avatamu mu lisiku lya Sabaato...

Pona!




Na vaana avanang'ana, avageene wunofu mandu



Valeshi avaana avanang'ana vayinse kunyang'u. UWutwa wa Nguluvi wuli kwa vaanu vina vali ngaja avaana ava.


UYeesu ishemeelwa kiluta ku Betaniya, ilijumbi lina lili nkholeela ni Yelusalemu. ULaasalo mutamu. ULaasalo na vawulumbu vaakwe vavili uMalita nu Maliya, vakhandi vamanyi mandu va Yeesu. UYeesu pina iifikha ku Betaniya ipulikha kiija, uLaasalo wáfwisaga nsiku sina, sina sashilaga...



Mutwa, nda waali uveesaje baaha, uwulumbu wangu ndi asaafwa.



Uwulumbu waakho asifyushe, Malita.



Eena nimeenye. Akhafyukha ilisiku iliya wudugo, lina uNguluvi akhavafyusa avaanu woona.



One yuune wufyukho nu wuumi. Yuna ikinihuviilila one, akhava muumi. Wuli, wihuviilila ago Malita?




Eena Mutwa. One nihuviilila kiija owe yuuwe yuna uNguluvi akufiliishe mu nyi.



Mwamusiiila kwi?

Mutwa, yinsa uyibedele!





Avakhome ava ku Yelusalemu vitungumala mandu, ulwa Yeesu na vavanda vaakwe.



Umuunu uyo igaha amabikha minshi mandu.

Nda tileshe aga gayiteneshe kiiva shiishi, aValuumi vasinanganie injowo.

Vasiyanganie inanda yeesu imbaagule iya kifuunyila naye nyi yona!



Hiivaji wunofu. Shiba mandu umuunu yumo afwe kwa kiiva ya vaanu wona, kulikho inyi yona yinangwe.



Ulo lulwene luyamfiso, uYeesu mbakha abudwe.




Kihuma uluhaavi ulo, avakhome va Vayahuudi vaava visakula insila ya kimutawula uYeesu kwa Valuumi. Awo vaveene vanya wutawulilwa uwa kimuhiga afwe.

Uluhaavi luulo, kukhandi kuna shiwungo ku lijumbi lya Betaniya...



Amafuta aga mununsi munofu ago, gigusiwa kwa hela nyinshi.




Maliya!



Amafuta aga mununsi munofu ago, gigusiwa kwa hela nyinshi.



Gaava gakwiliile kigusiwa, ihela iso ndi vapeelwa avapiina.



Yuuda, muleshi umaayi uyu. Wágususuuta umuvili gwangu amafuta amanofu, kiguyandaala kwa kinisiila.

Ishiwungo sha Pasaakha shili nkholeela. Amalugu ga vaanu vishuula viiluta ku Yelusalemu.



Mu lijumbi lya Yelusalemu, avalongosaaji vipulinkhana kimukhata uYeesu. Hata ndeeno umwene iiluta.





Avaanu vikimusaajisa kwa wushendeefu mandu.

Isaaga!

Isaaga!




Ayimililwajwe yuna iyinsa kwa litaawa lya Mutwa uNguluvi!

Mutwa wa Isilaheli!




Owe lijumbi lya Yelusalemu, waali uve wiimanya gina wisakulwa kigasenga, baheene ndi waava nu wulindamafu!



Tisikwiliile kigaha shoshoona, nda injowo sili ndeeni?

Avaanu wona vikimufwata.



Inanda imbaagule iya kifuunyila yina yili mu lijumbi ilya Yelusalemu, yiyeene yina aVayahuudi woona vakhandi visakulwa kifuunya.



Uluhaavi lwa shiwungo sha Pasaakha, inyana nkholo sishinjwa.



Uluvala lwa shila nyana nkholo luhumisiwa shadanda mu nanda imbaagule iya kifuunyila kwa kiiva ya vaanu, baheene kivalingaania nu Nguluvi.







Leelo, shadanda shishi isha nyana nkholo shikwiliile shiyooli kivawuusisa avaanu uwunansi waanave?



Mu lukeeke lwa nanda imbaagule iya kifuunyila, avaanu viigusa na kibadilisia ihela.



Shitu, uYeesu itwiwukha baaho.





Inanda ya Nguluvi yisakulwa kiiva nanda ya kifuunyila, leelo omwe muyisetwile kiiva mongolo ya vahiji!



Uyu iilwa kiiva muunu wa hataali, leelo avaanu vikilihuviilila shila liswi lina ikililogola.



Shiyooli, yisakulwa tisakule insila ya kimubuda.





Nda tigehe kwa wusugu, tisimupate. Apo baheene tikwiliile kimubuda.

Leelo yisikhavesaga uluhaavi lwa shiwungo. Tisigeene kiiva ni libaatu lyolyona uluhaavi lwa shiwungo sha Pasaakha.

Musinipeele isilinje silinga, nda nimuleete uYeesu kunyeenyu?


Uyo yumwene uYuuda, umunyaayumo wa vamanyaisiwa vaakwe.




Nisimuleete uYeesu kunyeenyu.




Tisikupeele ihela mashumi gatatu (30), nda utuleetele uYeesu. Uluhaavi ulo, ihela sila sikhandi sikwiliile kimugula umuvanda yumo.



UYeesu ikivakhoma avaanu mu nanda imbaagule iya kifuunyila pina shisinaafishe ishiwungo sha Pasaakha. Leelo avalongosaaji viijesa kimusivila kiiija asikhagahaga ndeeno.



Uluhaavi ulwa shinyijjuva isho, uYeesu na vamanyisiwa vaakwe ishumi na vavili (12) vitangaana pa lijumbi kwa kiiva ya kiilya ishakiilya isha shiwungo sha Pasaakha.





Nina lihaahi mandu kiilya
ishakiilya isha shiwungo ishi
isha Pasaakha lumu noomwe,
pina nisinalafisiwe.



Avakhome vikivatema avaanu
kwa ngufu, leelo omwe,
musikhagahaga ndeeno kaa.



Umuvanda wa woona,
uyo yumwene asiive
mukhome weenyu.



One nili noomwe, ngaja
muvanda weenyu.






Mutwa, owe uniyoose amagulu one ngaja movanda? Ndaali, usiniyoosa kaa!

Nda nisikuyosiise amagulu gaakho owe Petulo, usikwiliile kiiva lumu noone khanji.

Omwe mukinishemeela one Mutwa na Mumanyisaaji, mwijova wunofu, kiiva shi nishwali. Kiiva one navayoosa amagulu geenyu, shiisho ndeeno nayuumwe musenjelanaje ngaja shina navasenjela one.



Mutwa, ino niyoosa, gasili magulu hela, leelo naga mawokho nu mutwe goope!


Umuunu yuna ayiyoojile, asisakulwa kiyiyoooga khanji, ila kiyiyooosa amagulu geene duguli.



Umunyaayumo weenyu asinidoolele.


Ndaali!

Nisili yuune, asi?



Yuuda, shina wisakula kishigaha, shigahaga nyangu.






Gahaji ndeeni mala nyinshi, kwa kinikumbukha one...



Toolii, mulye umukhaate, ugu gugwene muvili gwangu.



Toolii, mung'we idivaayi iyi, kiiva yiyeene danda yangu yina yikunukha kwa kivasajila uwunansi weenyu. Kwa nsila iyi, uNguluvi iviikha ulufingo ulupya noomwe.



Nikivapeela omwe indaji imya. Gananaji ngaja one shina nivageene omwe.



Nda muganane, avaanu woona vasiimanye kiija omwe muli vamanyaisiwa vangu.



Mutwa, one nisikufwate kokoona. Nisiifwe kwa kiiva yaakho.



Petulo, pina injogolo yivikha, owe usiive wanikhaana mala khatatu.

Paanyuma, ishinyijjuva shila, uYeesu na vamanyaisiwa vaakwe viwuukha mu Ijumbi. UYuuda asili lumo nawo...

One nikivalekha, leelo uDaada akhavaleetela uNumbula uMunofu. Uyo akhavatanjilisa na akhava lumo noomwe.

Omwe muyimeenye insila yina yikivalongosa uluvala luna niiluta.

One nili nsila na shiyooli, khanji nili wuumi. Kusiina umuunu yoyoona yuna akwiliile kiyinsa kwa Daada, nda asishiliile kunyangu.

Khalaji panu. One niiluta pamwandi padoodo, kifuunya.

Wee Daada, nda yikwiliile, nikikulomba usikhagatawulaga kunyangu amalava amakhome aga.

Usikhagahaga ngaja shina nisakula one, leelo ugahe ngaja shina wisakula owe.

Paanyuma, ishinyijjuva shila, uYeesu na vamanyaisiwa vaakwe viwuukha mu Ijumbi. UYuuda asili lumo nawo...

One nikivalekha, leelo uDaada akhavaleetela uNumbula uMunofu. Uyo akhavatanjilisa na akhava lumo noomwe.

Omwe muyimeenye insila yina yikivalongosa uluvala luna niiluta.

One nili nsila na shiyooli, khanji nili wuumi. Kusiina umuunu yoyoona yuna akwiliile kiyinsa kwa Daada, nda asishiliile kunyangu.

Khalaji panu. One niiluta pamwandi padoodo, kifuunya.

Wee Daada, nda yikwiliile, nikikulomba usikhagatawulaga kunyangu amalava amakhome aga.

Usikhagahaga ngaja shina nisakula one, leelo ugahe ngaja shina wisakula owe.

UYeesu itwalwa kwa mutambule umukhome, yuna mukhome wa valongosaaji woona ava Vayahuudi. UPetulo nu Yohana vikimufwata kwa kutali.



UPetulo iyingila mu lukeeke lwa nanda yaakwe.



Wuli, owe usaava lumu nawo?



Nisigameenye ago gina wilogola!

Wee muunu wee! One nisigameenye gina wiijova!


Owe uli munyaayumo waanave, shilushwali ndeeno?




Ndaali! Nisimumeenye umuunu uyo.

Shiyooli khabisa, nayuuwe waava ukwali pala! Kiiva nayuuwe uli Mugalilaya!





UYeesu ileetwa pa Pilaato, umukhome wa Shilumi. Avalongosaaji va Vayahuudi vikivahonsa avaanu vina viloleela. Vilyova na kivasitaakha mu minshi.



Owe wijova wuli ulwa masitaakho ago goona? Wuli, usiyankha lyolyona?




Wuli, waagaha shishi?


One nayinsa kishibedela ishiyooli.




Ishiyooli, uluganulo lwakwe shi?



Nisikilyaga ilikhosa lyolyona kwa muunu uyu. Lino luhaavi lwa shiwungo sha Pasaakha. Nimudindulile yu naani, uBalaaba awu umutwa wa Vayahuudi?





UBalaaba!

UBalaaba!



Ino, mwisakula nimugahе shishi uYeesu uyu lino?

Mukhomeeleli pa musalaaba!


Umwene ikiyihiiva kiija, mutwa!

Nda umudindulile, ino owe usili mutwa wa Valuumi.



Owe widindulilwa, upyanile pamwene.

UBalaaba idindulilwa. Umwene akhandi adindiilwe kwa wunansi wa kimubuda umuunu kwa njowo sa siyaasa.



..., 37, 38, 39!



One nigaya wuvi ni danda yaakwe.



Aaje senga, mutwa wa Vayahuudi.



Muloleeli umuunu uyu.

Mukhomeeleli pa musalaaba!

Mukhomeeleli!

Mukhomeeleli!




UPilaato iyiitikha uwuhigo wa mfwa. Uuhigo wa mfwa kwa kikhomeelelwa pa musalaaba, wukhandi wuhigo wuna wukhandi witiilwa mandu. UYeesu ikigusumula umusalaba, guna gukhandi shombo sha malava, iishila mu njinji isa lijumbi.







Uluvala luna vakhandi vikivakhomeelela, lukhandi kunja ya lukeeke lwa lijumbi. Uluvala ulu lutambulwa Goligota, uluganulo lwakwe kiiija luvala lwa lipangalasa lya mutwe.



Panu avasulukhali vikimukhomeelela uYeesu pa musalaaba kwa masumali, mu mawokho na mu magulu.






Kigomanjilwa kwa Yeesu kwayonjelela kwa ngufu mandu. Ikiyihaama ibooma ya Galilaya na kiyitenekha ni nsengo yaakwe mu mbali isinji sa Isilaheli lumo ni shipuga sha vavanda avashimaayi na vavanda avagoosi.



UYeesu ikhaana ishing'welwa isha kisivila uwuvafi.



Avasulukhali vikigatovela ikuula amenda gaakwe.



Eena. Wuli, asikhavakulwisa avaanu avanji?



Owe nda uli Lusawo lwa Nguluvi, ino yiikha pa musalaaba!

Yikulusa yuuwe, baheene utukuluse na yuuse!

Owe usikumutiila uNguluvi hata padoodo. Ose tikigapata gala gina tisakulwa tigapate, leelo umuunu uyu asigahile lyolyona ilivi.



Pina ukhava wiyinjila mu wutwa waakho, unikumbukhaje.




Nikikujovela, shiyooli iminsiyaano usiive lumo noone mu lupepo.

Yikhandi ilisala lya mutanda paminsi, ilijuva lyalindivala, inshiisi yagubikha.



UMaliya, umaayi wa Yeesu, nu mumanyisiwa uYohana, viyiima nkholeela nu musalaaba.

Lino omwe, muli maayi nu mwana.




Ninaaa nkhawu.



Nguluvi wangu, Nguluvi wangu, kwashi wanilekha?




Daada, nikiyiviikha inumbula yangu, mu mawokho gaakho.



Insengo yangu yaasila!



UYeesu iifwa ilisala lya gonja ishinyijjuva.
Umusulukhali yumo ikimuhoma uYeesu
mu luvafu, yiihuma idanda na malenga.



AMayandikhwa aManofu gijjova,
"Wálongosewaagwa ngaja nkholo
yina yiiluta kishinjwa."



Wáhomwagwa na kipondwa
kwa kiiva ya wunansi weesu.
Leelo lino wáfwisaga.




Wuli, uyo yu Mesiya
yuna ahepeleseewe
kiyinsa awu yunji?



Haya, tilute tilombe
vatutawule kimusiila.



UYusufu yuna wáhumile mu Alimataaya nu
Nikodeemu vikigutoola umuvili gwa Yeesu.
Vikiguvilinjisa isanda lumo na mafuta aga mununsi
umunofu, na kiguviikha mu lijooja. Viviikha
iling'anga ilikhome pa mulyango gwa lijooja.



Saganaga kishila insiku sa shiwungo sha Pasaakha, avashimaayi vamonga vina vakhandi vasugumiilwe mandu, vaaluta ku lijooja.




Iling'anga libilusiwe kutali ni lijooja!



Kwashi mukimusakula yuna muumi mu luvala lwa vina vafwile? Wáfyukha! Luti muvajovele avamanyiisiwa vaakwe.



Vaganaga kipulikha ndeeno, uPetulo nu Yohana vaasiga kiluta ku lijooja.




Kwava shishi?



Akwasiina mu lijooja!






Ku shiisi shina
shilipiliime ilijooja...



Nyineesu, kwashi wikhoola?
Ukimusakula yu naani?




Wuli, mutwa,
wamutoola?



Maliya!




Mumanyisaaji!



Usikhanikhatililaga.
Vajovelaga avalukholo
lwangu kiija, niitina kwa
Daada wangu na Daada
weenyu, kwa Nguluvi
wangu na Nguluvi
weenyu.

Ilisiku liilyo, avavanda vavili va Yeesu, vakhandi vayolwepwe, vamwaga umushila nsila, vaava vilogola nawo ulwa kibudwa kwa Yeesu...

Wuli, kwashi omwe musikigahuviilila gala goona gina gakuwaagwa na vakuwamalago? Wuli, yisikhandi yisakulwa uMesiya kilafisiwa? Ago goona, gayandiikhwe mu Mayandikhwa aManofu.



Shitu, uluhaavi lwa shakiilya, umuhensa waanave iyasilinkhana...

Leelo, uyo wáava yu Yeesu yumwene!



Viwuukha nyangu, kiluta kivasakula avamanyisiwa avanji va Yeesu.


Tamwaga uMutwa!

UMaliya nu Petulo woope, vamwaga!



Shitu...

Uwulindamafu wuve lumo noomwe.







Wuli, omwe musihuviilila kiija yuune? Loleela amawokho na magulu gangu.




Owe yuuwe Mutwa wangu na Nguluvi wangu!

UYeesu ikivatwiwushila avavanda vaakwe kwa nsiku mashumi gana (40) wiila. Hata ikiyiwonensa kwa vaanu 500 gwalimo. Ilisiku limonga, avamanyisiwa avamonga vakhandi viilova inswi mu lilamba lya Galilaya...





Wuli Petulo, owe shiyooli unigeene?




UYeesu ikimuposa uPetulo iliposo ilyo, mala khatatu...



Eena Mutwa, owe umeenye kiiija nikugeene.

Diimaga inkholo sangu.



Nifwataga!

Nipeliilwe uwutawulilwa woona uwa kushaanya nu wa mu nyi. Lutaji kwa vaanu va nyi soona, muvagahe vave vamanyiwi vangu. Vatwiniaji kwa litaawa lya Daada uNguluvi, lya Lusawo ni lya Numbula uMunofu, na kivamanyisa kigayinatila goona gina navalajisa omwe.



Kumbukhaji kiiija, one nili lumo noomwe wiila, mbakha ilisiku lya wuhigo.

Gaganaga kishila amaswi aga, uYeesu wayilekha inyi na kiluta kushaanya kwa Nguluvi. Leelo khanji iijova kiiija, akhatina kivahiga avaanu woona...

UYeesu wáwuukha. Avavanda
vaakwe viheepa mu lijumbi lya
Yelusalemu, vifuunya. UNumbula
uMunofu, uNumbula wa Nguluvi,
ikivayiishila na kihuluta mukhati
yaanave. UNumbula yuyula yuna
akhandi akwali mukhati ya Yeesu,
lino khanji iikhala mukhati
yaanave. Ikivagaha vave vaanu
vapya, vina vilunjikha imola sa
Yeesu.

Imfwa
yisikhamukhatiile
uYeesu ku wusimu.
UNGuluvi
wámugomosesaaga
uwuumi waakwe.
UNGuluvi
wámugahaga ave
Mutwa wa Vatwa.




Avavanda va Yeesu viiluta popoona mu nyi,
hata nda kuna vaanu vinshi vikivasivila.

UYeesu, Lusawo
Iwa Nguluvi!




Imola inofu iyo,
yakhomwagwa
na kwa nsila ya
balula.

Wáwutoolaga uwunansi
weesu kwa nsila ya
muvili gwakwe
yumwene, pina
wáfwisaga pa
musalaaba. Kwa kiiva ya
uwo, nayuuse uwiikhasi
weesu uwa wunansi
wufwile. Kihuma lino
tikwiliile kikhala ngaja
uNguluvi shina isakula
tikhale.



Lino avavanda va Yeesu,
popoona pa nyi, vikungaana na
kifuunya lumo na kiyimba
aMayandikhwa aManofu.
Vimenyulilana umukhaate viilya
na kiing'wa idivaayi. Viigaha
ndeeno kwa lugulumilo lwa
kikumbukha imfwa ya Yeesu.
Ulugano lwa Nguluvi luna luli mu
numbula saanave, vihanga na
vashegamane vaanave.

UYeesu wávagaha avaanu
vakwise ulugulumilo lwa
Nguluvi.



UYeesu akugeene!
Umuhonjesaaje na
umufuunyaje.



UNguluvi avageene mandu avaanu
woona ava mu nyi muno. Lulwene
wámuhumyaga ku veene uLusawo
lwakwe yuna ali mwene duguli,
kiyinsa mu nyi muno, kiija umuunu
yoyoona yuna ikimuhuvilila
asikhayagaga, leelo awupate
uwuumi wa shiluta.

WILLEM DE VINK

BIBILIYA

Ulusimo lwa Yeesu luyandiikhwe mu Bibiliya. Kusiina ilitaafili ilinji lina liyimbiilwe awu lina liyimbwa mandu lino ndeeni, kiyishila iBibiliya. Ilitaafili ili lisumwile amataafili aganji minshi. Likhatoolele maakha 1500 ndeeni, kiyandikhwa amataafili gaakwe goona. IBibiliya yoona yikhasilile kiyandikhwa mu maakha ga 1900, gina gashilaga. Yina shila nsimo, isa Nguluvi shina wáyigubutulaga mu wiikhasi wa vaanu. Ulusimo lwa Yeesu luwonensa mandu kiija, uNguluvi yu naani.

IHSITOLIYA YA YEE SU

IBibiliya yina mataafili gana (4) gina gitaviilila uwiikhasi wa Yeesu.


Gatambwilwe kwa kivinjilisania na mataawa ga vayandikhaaji.

Avayandikhaaji woona vakhandi vakwali uluhaavi ulwa wiikhasi wa Yeesu.

1. **Mataayo** - akhandi mwanandeje wa Yeesu. Akhandi isenga insengo ngaja mutofya khooi. Itaviilila shina uYeesu akhandi ikivasenjela avaanu va Isilaheli (aVayahuudi).

2. **Maluko** - akhandi ashaanali mudiimi pina uYeesu akhandi isenga insengo. Akhayandiishe injowo nyinshi ulwa mabikha gina wágahaga uYeesu.

3. **Luuka** - akhandi muhusi. Umwene wáli asimumeenye uYeesu. ULuuka itaviilila shina uYeesu akhandi ikivasenjela avaanu.




4. **Yohana** - woope akhandi mwanandeje wa Yeesu. Umwene iwonensa hasa kiija, uYeesu yu naani. UYeesu yu Nguluvi yuna wáyiyisaaga ave muunu, baheene avakuluse avaanu mu wunansi.

KISAWA KWA YEESU


Umaayi wa Yeesu, uMaliya akhandi ashaanali asinatwalwe pina uYeesu wásaviilwe. Wáali ashaanali muhinja yuna asinamumanye umugoosi mbakha kisawa kwa Yeesu. Kisawa kwa mwene kukhandi mabikha ga Nguluvi. Ilibikha ili lyayandikhwagwa mu Mayandikhwa aManofu, pina asinaasawe uYeesu. UYeesu asikhasaviilwe ngaja muunu umunya ngufu (shujaa) awu ngaja muunu yuna amanyiishe mandu (muhimu). Akhasaviilwe mu lupanga mu litiinyi lya ng'ombe, kwa kiiva kusikhandi ni mwenshe mu nanda iya vahensa.

AMABIKHA GA YEESU

UYeesu wágahaga amabikha minshi. IBibiliya yijjova wávaponiaga avaanu kishila mashumi gana (40). Kwa nsila ya mabikha, uYeesu wáwonensaaga ingufu ya Nguluvi nu lugano lwakwe. Wáwonensaaga kiija, uNguluvi isakula kivatanga avaanu na kivashendeefya.



IMFWA YA YEESU NU WUFYUKHO WAAKWE



Kwashi uYeesu wáfwisaga? Amataviililo gali mu Bibiliya.

Uluhaavi lumonga, avaanu woona tinangania. Injowo iso siseene sina sikimukhalasa uNguluvi na king'uula. Injowo iso sitambulwa wunansi. Uwunansi woona uwo, wukwiliile kivasivila avaanu kiiva vamanya va Nguluvi.

Ulo lulwene lugumilo lwa Yeesu, ulwa kiyinsa. Kwa kiyihumya yumwene uYeesu wátoolile yumwene ululawo lwa wunansi weesu. Ululawo ulo lukhandi mfwa. Kihuma uYeesu afwe kwa kiiva ya ose, tikwiliile kiiva vamanya khanji nu Nguluvi. Leelo tisakulwa kilomba kisaajilwa uwunansi wuna tiwugahile.

UYeesu wáfyukhaga kihuma kwa vina vafwile. UNguluvi wámupeelaga uwuumi khanji. Kwa kigaha ndeeni, uNguluvi wátiwonensaaga kiija umwene ana ngufu nkhome kishila imfwa.

Lino uYeesu iikhala nu Nguluvi. Na kwa kiiva muumi, shila luhaavi akwiliile kiiva mumanyi weesu. Isakula kitutanga tive nu wiikhasi wunofu, baheene timushendeefye uNguluvi.

AMAFUUNYO

Nda ulambiisile uwunansi wuna wawugaha na nda wisakula kiiva mumanyi wa Nguluvi, ukwiliile kifuunya amafuunyo ngaja aga:

"Wee Nguluvi munya lugano, ukinigana.

Wámufilikhaga uYeesu, uLusawo lwakho yuna ali mwene duguli.

Wáfwisaga pa musalaaba kwa wunansi wangu woona wuna nagahaga.

Nilomba unisaajile uwunansi wuna nagahaga. Nilomba mandu unisaajile.

Nihonjesa, kiiva uYeesu ikiniyimiilila.

Shila luhaavi nisakula one, nive waakho.

Nilomba unitanje nive nu wiikhasi wuna wisakula one nikhale.

Uve nkholeela noone shila luhaavi.

Nihonjesa kwa kiposheela amafuunyo gangu.

Owe wiigaha shoshoona shina witaahisa!"

UYEESU NOOWE

Ulusimo Iwa Yeesu, lungaya wudugo. UYeesu mumanyi wa vaanu vinshi mandu, mbakha lino. Inyi yoona yisetwishe. Leelo uYeesu ali lumo noose ngaja shina akhandi akwali ku Isilaheli. Asiwonekha, leelo umwene akwali.

Isakula ave mumanyi waakho iminsiyaano. Mupuliisa na ukwiliile kimugana umwene.

Wuli, wisakula kimanya mandu, ulwa Yeesu nu wiikhasi waakwe? Ukwiliile kigaha aga gina gifwata:

1. Yansa kiyimba iBibiliya yuuwe duguli. Ungayansa kiyimba ilitaafili lina liyandiikhwe nu Luuka.

2. Yansa kifuunya.

Logola nu Nguluvi na umupuliise. Ukwiliile kimufuunya uNguluvi kwa shilogolo shina shimanyikha wunofu.

3. Logolaga na vaanu avanji, ulwa Yeesu ni Bibiliya. UYeesu isakula avavanda vaakwe kitangana na kikhangasania inumbula na kiyimanyisa mandu ulwa mwene.



Title: UYeesu Mesiya (Jesus Messiah). Swahili: Yesu Masihi

Text and illustrations: Willem de Vink. Copyright © 1993 Stichting Wereldtaal, Houten, The Netherlands.

Published in Dutch as “Jezus Messias”.

Edition in Sangu © 2018

Digital copyright under the terms of the Creative Commons BY-SA license

All rights of translation, reproduction and adaptation reserved for all countries.

e-mail : jmpbk.app@gmail.com



UYEESU MESIYA Ulu lusimo lwa shiyooli lwa Yeesu uMesiya. Wákhalaga ku Isilaheli mu maakha ga 2000 gina gashilaga. Shila muunu yuna wátangaanaga nawo, wáswigaga. Kusiina umuunu yuna wágahaga ishiinu, ngaja shina wágahaga umwene. Kusiina umuunu yuna wálogolaga ishiinu, ngaja shina wálogolaga umwene. Amabikha gasenjekhaga kokoona kula, kuna uYeesu akhandi akwali. Wáleetaga ilimwemwe kwa vaanu woona vina wákhalaga nawo, na vina vakhandi vikimupuliisa. Shitu, uwudugo waafikha. Avalugu vaakwe, vamubudaga. Leelo uwo wusikhandi wudugo. Yimba yuuwe shina yikhandi na umanye ulusimo lwa Yeesu uMesiya, shina luyiteneeshe kumwandi.

Language: Sangu (Tanzania)

ISBN: 978-90-73150-82-9